

BELGICA NOVA,

ET

NOVA ANGLIA.



Ars illa America Septentrionalis quæ Virginiam inter & Novam Angliam jacet, à capite Malebarre ad usque promontorium Hinloopen, hodie appellatur Nova Belgica, quia primum auspiciis & sumtibus Batavorum hæc terra penitus lustrari cœpit, deinde continuis navigationibus frequentata & autoritate Illustrissimorum & præpotentum DD. Ordinum generalium Confederati Belgii, colonia deducta & castello in barbarorum solo, ipsis ultro concedentibus, exstructo, primum à Belgis cultum accepit. Hicce terris Africum versus multæ adjacent insulæ, quarum præcipua *Texelia*, quæ ob similitudinem cum insula Texel in Hollandia, illud nomen habet; insula Henrici Christiani, cui primus inventor suum hoc nomen dedit; & illa quam de suo nomine ita appellavit navarchus Adrianus Block.

Belgæ, tum qui primi hoc flumen subierunt, tum qui postea crebris navigationibus frequentarunt, mira narrant de proceritate arborum (egregio soli luxuriantis argumento) ad ædificia & naves etiam maximas idonearum, vitium sylvestrium copia, nucum summa abundantia, quarum fructus à Belgicis nonnihil abludunt, nam & minores sunt, & duriori atque adeo leviori cortice tecti: atque in eundem modum de aliis arboribus, plantis, herbis, quas terra sponte sua fundit: ubi autem industria humana atque labore colitur, maizium præstantissimum incredibili fœnore reddit, legumina quoque varia; phaseolos præsertim, mira & jucunda colorum varietate, peponum elegantissimas species, itemque angurias & similes fructus usibus aptissimos; ut nihil hic nisi sedula hominum industria desideretur. Hollandi autem jam variis locis triticum atque alia farris genera, item linum & cannabin, aliaque Europæa semina serere cœperunt, quæ solum benigne admodum patitur. Herbarum omnis generis hic passim magna est copia, quarum quædam & elegan-

America.

tissimos flores ferunt, quædam & ad medicinam faciendam utiles judicantur. In sylvis magna passim est ferarum copia, inprimis cervorum & reliquorum quadrupedum, quos pars hæc America Septentrionalis nutrit.

Aves quoque hic innumera reperuntur, tam majores quam minores: sylvicolæ pariter & quæ flumina & stagna amant; mira quoque plumarum elegantia & varietate. Hyeme quoque hic capiuntur præstantes gallopavi, præpingues & optimis carnibus. Flumina denique optimos pisces nutriunt, salmones, sturiones & alios quamplures.

Cæli temperies à Belgico climata non multum abludit, nam licet multis gradibus propius ad Æquatorē accedat, quam Hollandicum, tamen hic non minus hibernis mensibus friget, quam in Belgio, & gelu satis intensum est, crebraque & altæ nives decidunt & operiunt diuterram, eadem qua apud Belgas annorum varietate: similis ventorum inconstantia; & æstate crebra tonitrua, fulgura & validi nimbi. Ideoque vix ullam America regionem, coloniis à Belgico cælo deducendis aptiorem esse existimo; præsertim quum nihil hic desit, quod ad vitam humanam sustentandam necessarium judicatur, & uberius labore & industria parari possit. Sola armenta atque jumenta hic desiderantur, quæ levi negotio huc transportari, & ob pabuli pene ubique copiam commodissimè alii possunt. Vites autem, si cultura accederet, vini uberem proventum videntur polliceri.

Barbari in multas nationes & populos divisi, idiomate multum inter se, moribus vero perparrum differunt, eadem corporum constitutione, qua illi qui bonam N. Franciæ partem incolunt. Vestitus è ferarum exuviis, castorum præsertim, vulpium & similibus, barbarorum in modum confutis, quo se totos hyeme, neglectim æstate tegunt. Præcipuum illorum alimentum maizium, è quo liba quædam panum instar coquant, pisces, aves atque ferina. Arma, arcus & sagittæ acutis filicibus aut piscium ossibus asperatæ. Lintres ipsis uni lignei, è vastis arborum truncis igne excavati. Quidam incertis sedibus vagi sub dio, humi strati aut super storeas junceas, somnum pariter atque cibum capiunt,

E

idque